



Cuira, ils 27 d'avrigl 2026

Communicaziun a las medias

## «Rumantsch a distanza»: L'emna cumpacta reunescha giuvenils da l'entira Svizra

Dals 27 d'avrigl fin il 1. da matg 2026 organischescha la Lia Rumantscha en il Grischun in'emna cumpacta en il rom dal project «Rumantsch a distanza». 61 giuvenils da l'entira Svizra prendan part e passentan in'emna communabla en la Surselva, il Surses u en l'Engiadina Bassa.

Glindesdi, ils 27 d'avrigl, arrivan las participantas ed ils participants a Cuira, nua ch'els vegnan beneventads en la Chasa Rumantscha da Jon Domenic Parolini, cusseglier guvernativ e schef dal Departament d'educaziun, cultura e protecziun da l'ambient. Suentar sa repartan ils giuvenils sin ils lieus Glion, Riom u Lavin.

Durant l'emna spetga las scolaras ed ils scolars in program varià: Sper l'instrucziun l'avantmezdi stattan en il center activitads culturalas e regionalas. Quellas cumpiglian visitas da vitgs e museums, invistas en interpresas localas, lavuratoris creativs sco er inscunters cun giuvenils da la regiun. Betg il davos promovon er activitads cuminaivlas dal temp liber ed in concert final il venderdi il barat tranter las participantas ed ils participants.

L'emna cumpacta fa part da la purschida naziunala «Rumantsch a distanza» che la Lia Rumantscha ha introducì l'onn da scola 2024/2025. Il project pussibilitescha a scolaras e scolars da l'entira Svizra d'emprender rumantsch sco rom d'elecziun u facultativ - en tut ils tschintg idioms sco er en rumantsch grischun. Durant l'onn da scola han lieu duas lecziuns online ad emna; L'emna cumpacta actuala cumplettescha questa offerta.

L'onn da scola actual fan passa 90 scolaras e scolars da 12 chantuns part da quest project che vegn finanzià per gronda part da l'Uffizi federal da cultura. L'emna cumpacta vegn sustegnida era dal chantun Grischun. La finamira è da far pli enconuschentas la lingua e la cultura rumantscha e da rinforzar la chapientscha linguistic-culturala en Svizra. Ulteriuras [infurmaziuns davart l'offerta](#) èn disponibilas online.